

Senaid Hadžić

Filozofski fakultet Univerziteta u Tuzli
senaid.had@hotmail.com

RIMOKATOLIČKE ŽUPE BREŠKE I DONJA TUZLA U 19. STOLJEĆU. OSNIVANJE, TERITORIJALNI OKVIR I OSOBENOSTI STANOVNIŠTVA

Apstrakt: Tokom 19. stoljeća dolazi do značajnih promjena na prostoru Bosanskog ejaleta koje su svoje refleksije imale i u sjeveroistočnoj Bosni. Radi se o vremenu u kojem dolazi do stabilizacije prilika (političkih, ekonomskih, socijalnih, vjerskih) izazvanih čestim ratovima krajem 17. i u 18. stoljeću. Umjesto stalnog migriranja i iseljavanja započinje vrijeme oporavka naselja, domova, bogomolja, između ostaloga, i katoličkog stanovništva na prostore Zvorničkog sandžaka. U isto vrijeme stabiliziraju se vjerske prilike, osnivaju novi vjerski objekti, povećava se broj stanovnika. To je svojstveno i za rimokatoličke župe Breške i Donja Tuzla. To je, u većoj ili manjoj mjeri, dovelo do promjena u strukturi stanovništva navedenih prostora. O tome u radu, na osnovu izvorne građe, rukopisa pohranjenih u franjevačkim samostanima, putopisa, novina, popisa stanovništva, šematizama i relevantne literature donosimo provjerene podatke i pokazatelje.

Ključne riječi: rimokatolici, župa, Breške, Donja Tuzla, franjevci, Bosna i Hercegovina, migracije, promjene, konfesija, stanovništvo.

Abstract: During the 19th century there were significant changes in the area of Bosnian eyalet that had their reflection in northeastern Bosnia. It was a time in which stabilization of the situation took place (political, economic, social, religious), after the frequent wars in the late 17th and 18th centuries. Instead of permanent migration and emigration, there began the time of return of, among others, the Catholic population in the areas of Zvornik province. At the same time the religious situation was being stabilized, along with establishment of new religious buildings and increase of the number of inhabitants. This is specific for the Roman Catholic parish Breške and Donja Tuzla. The above mentioned facts, to a greater or lesser extent, led to changes in the population structure of the mentioned area. This work, based on original sources, manuscripts stored in the Franciscan monasteries, travelogues, newspapers, census, schematism and relevant literature, offers proven data and indicators about the topic of the reserach.

Keywords: Roman Catholics, parishes, Breške, Donja Tuzla, Franciscans, Bosnia and Herzegovina, migration, changes, confessions, population.

Uvodne napomene

Rimokatoličke župe Breške i Donja Tuzla nalaze se na prostoru koji je uvijek bio raskrsnica puteva, mjesto tolerantnog suživota, ali i interesovanja za navedene prostore kako iz susjednih tako i drugih evropskih zemalja. Naime, događaji iz zadnjeg stoljeća osmanske uprave u Bosni i austrougarska okupacija Bosne 1878. bili su povod neobičnom i živom interesovanju Austrije, Mađarske, Srbije, Crne Gore, ali i Engleske, Francuske, Italije, Rusije. Iz navedenih, ali i drugih zemalja jedni su dolazili da bilježe i prikupljaju podatke za potrebe okupacije, drugi kao predstavnici civilnih vlasti, a bilo je i onih koji su dolazili kao putopisci ili dopisnici raznih periodičnih publikacija. Neki od njih su svojim zapažanjima i zabilješkama otkrili i iza sebe ostavili značajne podatke, činjenice o ovim prostorima, narodu, običajima, vjerovanju, nošnji, protivrječnostima sa kojima su se susretali na svakom koraku. Također, značajna su zapažanja o odnosu stanovništva prema posljednjim predstavnicima osmanske vlasti, austrougarskim okupacionim trupama, prihvaćanju ili odbojnosti nove vlasti i slično. Takvi zapisi, često nastajali iz ličnog iskustva i doživljaja, koji se temelje najviše na preciznom, ponekad savjesnom i (ne)objektivnom bilježenju, mogu da posluže kao dragocjena i (ne)pouzdana građa koja i u novije vrijeme nije izgubila svoju naučnu, odnosno informativnu vrijednost. Putopisi, zapažanja, kao i knjige napisane o Bosni ne samo da daju realniju i potpuniju sliku o određenom prostoru nego ponekad predstavljaju jedini izvor o nekim pojavama i događajima.¹ Posebno su značajni izvještaji

¹ Ovdje navodimo samo neke radove: Aleksandar Giljferding, *Putovanje po Hercegovini, Bosni i Staroj Srbiji*, Sarajevo 1972; Prokopije Čokorilo, Joanikije Pamučina, Staka Skenderova, *Ljetopisi*, Sarajevo 1976; Artur Evans, *Pješke kroz Bosnu i Hercegovinu tokom ustanka avgusta i septembra 1875. godine*, Sarajevo 1965; Šarl Irijart, *Bosna i Hercegovina – Putopis iz vremena ustanka 1875.-1876.*, Sarajevo 1981; Milenko S. Filipović (priredio), *Memoari Živka Crnogorčevića*, Akademija nauka i umjetnosti Bosne i Hercegovine, Građa, Knjiga XIV, Sarajevo 1966; Midhat Šamić, *Francuski putnici u Bosni i Hercegovini u XIX stoljeću (1836.-1878.) i njihovi utisci o njoj*, Sarajevo 1981; Pavle A. Rovinski, *Zapažanja za vreme putovanja po Bosni 1879. godine, Donja Tuzla*, Časopis

duhovnih lica, te od 1835. štampani šematizmi-statistički podaci o župama redodržave Bosne Srebrene.²Na osnovu nekih od takvih zapisa (posebno rukopisi iz Franjevačkog samostana Kraljeva Sutjeska) nastala je zabilješka o imenu Donje Tuzle, o razvoju rimokatoličke župe Breške i Donja Tuzla i nekim osobenostima stanovništva navedenih župa.

Razvoj župe Breške i njeno stanovništvo

Breške kao naseljeno mjesto nalaze se na južnim obroncima planine Majevice, udaljeno oko 11 kilometara sjeverno od Tuzle.³ Naselje je dobilo ime po brojim brežuljcima od kojih je nastalo. Na jednom od brežuljaka nalazi se i crkva posvećena Uznesenju Blažene Djevice Marije koja je 1839. godine postala sjedište župe Breške. Prvi je župnik bio fra Stjepan Mikić. Od tada Breške neprekidno djeluju kao rimokatolička župa u sastavu Vrhbosanske nadbiskupije.

Na teritoriji današnje župe Breške postojala je ranije stara župa Dragunja koju 1623. godine spominje provincijal fra Marijan Pavlović u svom Izvještaju. Također, župu spominje i biskup fra Marijan Maravić 1655. godine. Zadnji spomen župe Dragunja nalazimo u Izvještaju biskupa Nikole Ogramića-Olovčića iz 1675. koji je posjetio župu u kojoj nije našao crkvu ali navodi da je živio 4.161 stanovnik. U Izvještaju on navodi i slučaj prelaska na islam jednog oca sa sinom, ali je, kako navodi, sin „zadržao ženu katolkinju“.⁴

Tokom Bečkog rata (1683-1699) došlo je do migracije katoličkog stanovništva sa područja župe Dragunja te je ista prestala sa radom.⁵ U 18. stoljeću navedeno područje se nalazilo u sastavu župe Donja Tuzla.⁶

ministarstva narodne prosvete, mart 1880, peta decenija, deo CCVIII, Sankt-Petersburg 1880.

² Od tada su štampani šematizmi 1836., 1840., 1856., 1864., 1877., 1887., 1895., 1906., 1935., 1963., te 1974. godine. Osim zadnjeg svi su štampani na latinskom jeziku.

³ Mijo Franković, *Župa Breške (Ogledi o župi u riječi i slici)*, Breške-Tuzla, 2009, 12.

⁴ Fra Stipo Ikić, *Liber Memorabilium I. Parochiae S.Petri Apostoli in Doljna Tuzla 1892.*, 31.

⁵ Nisu samo migracije i ratovi uzrok smanjenja, između ostaloga, i katoličkog stanovništva u Bosni. Primjera radi tokom 1691. godine u Bosni je samo od kuge pomrlo 3.000 katolika.

Kada se na sjevernoj strani tuzlanske župe počeo povećavati broj vjernika⁷, a tuzlanski župnik rezidirao u južnom kraju, u Husinu, te nije mogao pastorizirati tako prostranu župu, da se pomogne župniku pomišljali su sutješki franjevci na podjelu župe. U sporazumu s apostolskim vikarom uspostavili su lokalnu kapelaniju sa sjedištem u Lipnici, gdje je bila stara kuća. Ova nova lokalna kapelanija pastorizirala je od 1823. godine sjeverni kraj župe i vjernike u Gornjoj Tuzli. Obzirom da Lipnica, sjedište nove lokalne kapelanije, nije bila u središtu nove kapelanije, kupio je fra Marijan Semunović zemljište od Dizdar-age u selu Breške i 1833. godine sagradio kuću s ostalim potrebnim zgradama, te prenio sjedište iz Lipnice u Breške, nakon čega je kapelanija proglašena 1839. godine samostalnom župom.⁸ Tokom 19. stoljeća župu Breške vodilo je ukupno 17 župnika.⁹

Godine 1854. sagradio je fra Dominik Andrić kapelu (crkvu) 22 aršina dužine i 12 aršina širine. Služila je svojoj svrsi sve dok župnik fra

(Zvonimir Baotić, Velika seoba iz sjeveroistočne Bosne u vrijeme Bečkih ratova, *Od Gradovrha do Bača. Radovi sa Znanstvenog skupa u povodu 300. obljetnice preseljenja franjevaca i puka iz Gradovrha u Bač*, Sarajevo 1988, 44-45).

⁶ Marko Karamatić, Pastoralni aspekt franjevačke prisutnosti u sjeveroistočnoj Bosni (1699-1918), *Od Gradovrha do Bača*, 9-15; Julijan Jelenić, *Spomenici kulturnog rada franjevaca Bosne Srebreničke*, Mostar 1927.

⁷ Početkom četrdesetih godina 18. stoljeća, prema popisu fra Pave Dragičevića, u župi Donja Tuzla živjelo je 1.392 katolika (u sjeveroistočnoj Bosni 3.844 katolika). Četvrt stoljeća kasnije (1768.), prema popisu fra Marijana Bogdanovića, broj katoličkog stanovništva je gotovo udvostručen te ih je u župi Donja Tuzla živjelo 2.305 (u sjeveroistočnoj Bosni 7.232). Početkom 19. stoljeća (1813.) u župi Donja Tuzla živjelo je 3.779 katolika (u sjeveroistočnoj Bosni 15.114). Vidi: Dominik Mandić, *Chroati catholici Bosnae et Hercegovinae*, Chicago-Roma 1962, 64-73, 198-210; Dragutin Kamber, Stanje župa i duša apostolskog vikarijata u Bosni srebreničko-otomanskoj prema popisu izvršenom 1813, *Franjevački vjesnik*, god. XXXIX, br. 4, Sarajevo 1932, 22-28, 57-59, 83-88, 114-116; J. Jelenić, *Spomenici kulturnog rada franjevaca*.

⁸ Fra S. Ikić, *Liber Memorabilium I.*,31.

⁹ Od 1839. do 1900. godine na čelu župe Breške nalazili su se slijedeći župnici: 1. fra Marijan Semunović (1839.), 2. Stjepan Mikić (1839.), 3. Tomo Sočić (1840.), 4. Stjepan Mikić, drugi put (1842.), 5. Bartolomej Krajinović (1847.), 6. Domin Andrić (1849.), 7. Franjo Migić (1855.), 8. Filip Šimić (1859.), 9. Tadija Tepeluk (1861.), 10. Anto Čosić (1865.), 11. Blaž Dominković (1866.), 12. Ivo Oršolić (1867.), 13. Domin Andrić, drugi put (1870.), 14. Franjo Komadanović (1873.), 15. Franjo Pranjković (1879.), 16. Filip Poljaković (1889.), 17. Augustin Pejčinović (1898.). Berislav Gavranović, *Franjevački samostan Kraljeva Sutjeska*, II., 245. Rukopis u Franjevačkom samostanu Kraljeva Sutjeska.

Filip Poljaković nije sagradio novu crkvu 1890. godine, nedaleko od stare na okolnom brdu.¹⁰

U župi Breške živjelo je 1854. godine 518 bračnih parova, 2.439 stanovnika u 367 kuća: Breške 248 stanovnika u 31 kući, Dokanj 241 stanovnik u 27 kuća, Grabovica 353 stanovnika u 60 kuća, Lipnica 519 stanovnika u 73 kuće, Čanići 180 stanovnika u 19 kuća, Obodnica 353 stanovnika u 49 kuća, Drienča 329 stanovnika u 49 kuća, Dragunja Gornja 102 stanovnika u 12 kuća, Dragunja Donja 145 stanovnika u 18 kuća, Drapnići 84 stanovnika u 13 kuća i Jasenica 145 stanovnika u 16 kuća.¹¹

Prema podacima o broju stanovnika u jedanaest naselja župe Breške prosječno je u jednoj kući živjelo 6,65 stanovnika. Prosječno najbrojnije porodice bile su u naselju Čanići gdje je živjelo 9,47 stanovnika po jednom domaćinstvu (kući), zatim u naselju Jasenice sa 9,06 stanovnika po jednoj kući. Najmanje brojne porodice u prosjeku bile su u naselju Grabovica 5,28 stanovnika po jednoj kući, zatim Drapnići 6,46 i tako dalje.

Deset godina kasnije (1864.) broj stanovnika u župi Breške smanjen je na 2.273, a broj kuća 296. Analizirajući po naseljima koja su ulazila u sastav župe Breške broj stanovnika i broj kuća je slijedeći: Breške 284 stanovnika u 35 kuća, Dokanj 250 stanovnika u 28 kuća, Lipnica 263 stanovnika u 36 kuća, Čanići 190 stanovnika u 20 kuća, Obodnica 405 stanovnika u 62 kuće, Drienča 376 stanovnika u 51 kući, Dragunja Gornja 114 stanovnika u 14 kuća, Dragunja Donja 153 stanovnika u 18 kuća, Drapnići 87 stanovnika u 14 kuća i Jasenica 151 stanovnika u 18 kuća.¹²

Tokom jedne decenije (1854-1864) broj stanovnika u deset naselja župe Breške manji je za 164, a broj kuća je smanjen za 71. Nasuprot tome, prosječan broj stanovnika po jednoj kući je povećan za 1,03 člana. Tako je 1864. u jednoj kući prosječno živjelo 7,68 stanovnika. I dalje su najbrojnije porodice živjele u naselju Čanići, gdje je prosječno u jednoj kući živjelo 9,5 članova, zatim u Doknju 8,93 člana, Dragunja Donja 8,5 članova. U

¹⁰ Franjevački samostan Kraljeva Sutjeska (dalje: FSKS), Fra Mato Mikić, *Arkiva (knjiga četvrta)*, rukopis, 63; *Imenik klera i župa crkvene pokrajine u Bosni i Hercegovini za godinu 1885*; *Imenik klera i župa Nadbiskupije vrhbosanske za godinu 1910*.

¹¹ FSKS, Fra M. Mikić, *Arkiva (knjiga četvrta)*, rukopis, 64.

¹² *Franjevački samostan Kraljeva Sutjeska. Šematizam Provincije za 1864.*

prosjeku najmanje članova jedne kuće bilo je u Obodnici 6,53, te Drapnićima 6,21 član jedne kuće-porodice.

Dalje podatke o broju stanovnika i kuća u naseljima župe Breške donosi šematizam za 1877. godinu. Prema navedenom šematizmu u župi Breške je živjelo 2.507 stanovnika u 308 kuća. Broj naselja je povećan sa 10 na 12. Analizirajući po naseljima koja su ulazila u sastav župe Breške broj stanovnika i broj kuća je sljedeći: Breške 297 stanovnika u 33 kuća, Dokanj 300 stanovnik u 28 kuća, Lipnica 114 stanovnika u 15 kuća, Čanići 167 stanovnika u 18 kuća, Obodnica 470 stanovnika u 66 kuće, Drienča 400 stanovnika u 60 kući, Dragunja Gornja 124 stanovnika u 13 kuća, Dragunja Donja 213 stanovnika u 19 kuća, Drapnići 104 stanovnika u 15 kuća i Jasjenica 174 stanovnika u 16 kuća, Trstje 54 stanovnika u 8 kuća, Tisovac 94 stanovnika u 15 kuća.¹³

U periodu od trinaest godina (1864-1877) došlo je do povećanja prosječnog broja članova jedne porodice sa 7,68 na 8,14 stanovnika po jednoj kući. Također, uočljivo je da su u istom vremenu pojedina naselja, u prosjeku, imala više od deset članova koji su živjeli u jednoj kući (Dragunja Donja 11,21 stanovnik po jednoj kući, Jasenice 10,88, Dokanj 10,71 stanovnik i tako dalje). Nešto drugačija situacija o prosječnom broju stanovnika po naseljima i brojnosti porodica je u župi Donja Tuzla.

O imenu Donja Tuzla

Donja Tuzla se nalazi na južnoj strani rječice Jale, desne pritoke rijeke Spreče, između niskih i pitomih planina koje su djelomično prekrivene šumom, a djelomično su obrađene površine. U dolini leži dio grada, djelomično razbacan i grupisan na padinama brda. Donji grad je većim dijelom kompaktno izgrađen, kuća do kuće, i ograda do ograde. Ostala su samo dva šira prostora s močvarom koja se nikada ne presušuje. Neke kuće su izmiješane s vrtovima, skrivene u uvalama, iza brdskih grebena. Takvom izdvojenošću odlikuje se, prvenstveno, onaj dio grada koji leži na lijevoj obali Jale, preko koje je postavljen jedini most na

¹³ *Franjevački samostan Kraljeva Sutjeska. Šematizam Provincije za 1877.*

kamenim stubovima.¹⁴ S kraja 18. i početkom 19. stoljeća tuzlansko utvrđenje je izgledalo ovako: imalo je dva pojasa, širi i uži. Širi pojas obuhvatao je osim službenih osmanskih zdanja i atik džamiju (šarena džamija), katoličku kapelu, sahat-kulu, te mnoge stambene zgrade i dućane, meraju, tratinu. U zidu šireg pojasa bila su četvora vrata: glavna je bila džindijska kapija, a ostale su se zvale jalska, stara i poljska kapija. Unutar toga nižeg i slabijeg zida bio je sam kastel, utvrda u užem smislu, mnogo manjeg obima, ali s jačim i višim zidovima, sa samo jednim vratima, uz koja se dizala dizdareva kula. Nakon eksplozije u tvrđavi 1857. godine, koja je znatno oštetila bliže zidove, stanovništvo je počelo raznositi kamenja, tako da je osmanska vlast dio vanjskog zida oborila 1871. godine, a ostatak je srušen 1894. godine, jer su zidovi smetali razvoju grada. Od ostatka kamena tvrđave podzidana je obala Jale, sazidan Kameni sud, a pretpostavlja se da je kamen upotrijebljen i za druge građevine.¹⁵

Područje Donje Tuzle pokazuje kontinuitet življenja u jednom dugom vremenskom periodu.¹⁶ U Srednjem vijeku Donja Tuzla je bila mjesto u oblasti Soli. Tako se tada zvao kraj između rijeke Save, Drine, Drinjače i Brke. Ime je izvedeno od slanih izvora oko rijeke Spreče i njenih pritoka. Bizantijski car i pisac Konstantin VII Porfirogenet (912-959) prvi spominje, sredinom 10. stoljeća, ime glavnoga mjesta oblasti Soli u svom djelu *De administrando imperio* pod nazivom „To Salenes“.¹⁷ Kada su Slaveni naselili ovaj kraj, preveli su ime Salinae na svoj jezik i nazvali ga Soli, grad

¹⁴ P. Rovinski, *Zapažanja*, 1-4.

¹⁵ Prvi opis grada Tuzle koji je sagrađen 1760. godine dao je Vaso Glušac (Soli ili Tuzla, *Rad*, br. 3, Tuzla mart 1923). Vidi: Hamdija Kreševljaković, Hamdija Kapidžić, *Vojno-geografski opis Bosne pred Dubički rat od 1785. godine (prema opisu zastavnika Brodske graničarske regimente Božića)*, Naučno društvo NR Bosne i Hercegovine, Građa, knj. VII, Odjeljenje istorijsko-filoloških nauka, knj. 5, Sarajevo 1957, 65-66.

¹⁶ O tome više vidi u: Ivan Puš, Neolitsko naselje u Tuzli, *Članci i građa za kulturnu istoriju istočne Bosne*, br. 1, Tuzla 1957, 85-102; Borivoje Čović, Rezultati sondiranja na preistorijskom naselju u Gornjoj Tuzli, *Glasnik Zemaljskog muzeja*, br. 15-16, Sarajevo 1961, 79-139; B. Čović, Nekoliko manjih preistorijskih nalaza iz Bosne i Hercegovine, *Glasnik Zemaljskog muzeja*, Sarajevo 1957, 252-253; Milica Baum, Župa Soli, *Članci i građa za kulturnu istoriju istočne Bosne*, br. 1, Tuzla 1957, 9; Esad Pašalić, *Antička naselja i komunikacije u Bosni i Hercegovini*, Sarajevo 1960.

¹⁷ Milica Baum, Župa Soli, 7-37.

solli.¹⁸ Tako se narodnim imenom nazivalo mjesto sve do početka 18. stoljeća kada se počelo nazivati osmanskim imenom Tuzla (tuz = so). Prvi put nalazimo osmansko ime Tuzla u sumarnom popisu Bosanskog sandžaka iz 1468. godine, tj. u naknadnim bilješkama u tome popisu datiranim 1477. i 1478., s nazivom Agač Tuzla – Drvena solana. Tuzla se tako naziva i u detaljnom popisu Smederevskog sandžaka iz 1476/1477. godine.¹⁹ Također Tuzla se spominje i u jednom putopisu nepoznatog njemačkog pisca koji je proputovao i opisao ovaj kraj u vrijeme Eugenovih, odnosno Petraševih operacija protiv Bosne. U tom putopisu ukratko se spominje i Tuzla koja ima neznatnu tvrđavu sa malo artiljerije. Stanovnici su, veli, sve sami muslimani (Turci).²⁰ Okolo ima dosta naseljenih sela u kojima su tri dijela kršćani, a ostalo muslimani. Idući iz Gračanice prilaz je u Tuzlu dosta ugodan, a odatle prema Zvorniku može se putovati samo na konju.²¹

Austrijska okupacija preuzela je osmanski naziv Tuzla i učvrstila ga još više nego Osmanlije tako da se narodno ime Soli počelo zaboravljati dok se nije gotovo sasvim potisnulo iz upotrebe. Prije okupacije seosko stanovništvo nazivalo je ovomjesto „Donje Soli“ te se u svakodnevnom razgovoru mogao čuti izraz: „Bio sam dolje u Solima.“²² U katoličkim župskim Maticama umrlih (od 1797. do 1860.) pisalo se mjesto gotovo uvijek „Salinis“. U njima se prvi put nalazi ime Tuzla 28. aprila 1809. godine, a 16. juna 1858. nalazi se narodni naziv Soli Doljne, odnosno Tuzla Donja.²³

¹⁸ Jedini konkretan podatak o jednom naselju u tuzlanskom kraju jeste spomen mjesta Soli, pronađen u Dubrovačkom arhivu, a datiran 1412. godine. Odnosi se na varošicu Donje Soli koju su Osmanlije zatekli kao najznačajnije naselje na tuzlanskom području. (Adem Handžić, *Tuzla i njena okolina u XVI vijeku*, Sarajevo 1975, 25-26).

¹⁹ A. Handžić, *Tuzla i njena okolina*, 31-32.

²⁰ Putopisac je koristio termin Turci, ali se on odnosi na muslimane, pripadnike islamske vjere. Mi ćemo u radu koristiti termin muslimani, koji se najčešće upotrebljava u literaturi, ali i u popisima stanovništva, rizikujući da pod ovaj pojam obuhvatimo i jedan broj Turaka, istina neznatan, koji su se nalazili u Donjoj Tuzli. (B. Gavranović, *Rukopis*, 247).

²¹ Gustav Bodenstern, Povijest naselja u Posavini g. 1718.-1739, *Glasnik Zemaljskog muzeja*, XX/1908, Sarajevo 1908, 98.

²² B. Gavranović, *Rukopis*, 247.

²³ *Isto*.

Razvoj župe Donja Tuzla u 19. stoljeću

Kada je riječ o župi Donja Tuzla ovdje prije svega treba imati u vidu činjenicu da su franjevci od osnivanja franjevačkog reda,²⁴ preko osnivanja bosanske vikarije,²⁵ gubitka pojedinih samostana i slično prošli brojna iskušenja.²⁶ Bili su osporavani, nerazumijevani, ponekad protjerivani, prihvaćeni, darivani, kuđeni i hvaljeni, ali su ostali dosljedni svojoj misiji. Uvijek su bili u službi stanovnika, čuvari kulturnih i drugih vrijednosti, skromni i nenametljivi ali odani državi.²⁷ U svom organiziranju na prostoru Bosne i Hercegovine prošli su od Bosanske vikarije do provincije Bosne srebrene koja se jedno vrijeme prostirala na teritoriji triju država da bi sredinom 18. stoljeća (1757.) bila svedena u političke granice Bosne i Hercegovine.²⁸

²⁴ Ignacije Gavran, *Fellow-travellers of Bosnian History. Seven Centuries of Bosnian Franciscans*, Sarajevo 2001, 196; *Franjevačka provincija Bosna Srebre* (šematizam), Franjevački provincijalat, Sarajevo 1991, 257-266..

²⁵ Bosanska vikarija osnovana je 1339./40. godine, a prvim vikarom imenovan je fra Peregrin Saksonac. Mijo Vjenceslav Batinić, *Djelovanje franjevaca u Bosni i Hercegovini za prvih šest vijekova njihova boravka*, I, Vikarija (1235.-1517.), Zagreb 1881; Julijan Jelenić, Problem dolaska franjevaca u Bosnu i osnutak Bosanske vikarije, *Nova Revija*, br. 3-4, 1926; *Franjevačka provincija Bosna Srebre*, 257-266.

²⁶ Franjevački samostani u Fojnici, Konjicu, Kreševu, Sutjesci i Visokom porušeni su 1524., u Jajcu 1528., Zvorniku 1533., Modriči 1579., te u Donjoj Tuzli 1580. godine. (*Franjevačka provincija Bosna Srebre*, 257-266).

²⁷ Julijan Jelenić, Spomenici kulturnoga rada bosanskih Franjevaca (1437.-1878.), *Starine Jugoslavenske akademije znanosti i umjetnosti*, knj. XXXVI, Zagreb 1918, 81-162.

²⁸ Župom Donja Tuzla (župa sv. Petra i Pavla) upravljali su franjevci Bosne Srebre (Srebreničke). Godine 1209. papa Inoćentije III odobrio je Franjevački red, zatim 1291. godina uzima se kao početak djelovanja bosanskih franjevaca. Nakon toga, 1339-1340. godine, osnovana je Bosanska vikarija (od bosanske vikarije odvojena kustodija u Apuliji 1446., osnovana ugarska vikarija odvajanjem od bosanske 1447., odcijepila se dubrovačko-dalmatinska vikarija sv. Jeronima 1469., bosanska vikarija podijeljena na Bosnu-Hrvatsku i Bosnu Srebre 1514., osnovana bugarska kustodija od provincije Bosne Srebre 1624., od Bosne Srebre odvojila se kustodija Transilvanija 1640., odvojili se prekosavski samostani-Slavonija 1757., uspostavljen apostolski vikarijat u Hercegovini odvajanjem od bosanskog 1847. godine. Vidi: István György Tóth, Franjevci Bosne Srebre kao misionari u Turskoj Ugarskoj (1584.-1716.), *Scrinia Slavonica*, br. 2, 2002, 181; Mijo Vjenceslav Batinić, *Djelovanje Franjevaca u Bosni i Hercegovini u prvih šest vijekova njihova boravka*, sv. II, Zagreb 1883; Andrija Zirdum, Dioba franjevačke provincije Bosne Srebre 1735. godine, *Bosna franciscana*, br. 12, Sarajevo 2000, 127-151; Jako Baltić

I župom Donja Tuzla upravljali su franjevci ove provincije. Teško je tačno odrediti kada su se franjevci doselili u Tuzlu, ali se pretpostavlja da su na ovome prostoru podigli svoj samostan krajem 14. ili početkom 15. stoljeća. Ukoliko se naprijed navedeno ima u vidu onda se može kazati da je katolička župa u Donjoj Tuzli veoma stara, te da je preuzela djelovanje nekadašnje samostanske župe. Tuzlanska se župa prostirala od planine Konjuha do planine Vjetrenika, od Srebrenika do Vlasenice, Srebrenice i Zvornika. U prvoj polovini 17. stoljeća franjevci su opsluživali tri župe: Tuzla, Gračanica i Pojanje. Ova zadnja je do sredine stoljeća nestala, tako da su kasnije preostale samo dvije. Budući da je krajem 17. stoljeća dosta katolika iz Tuzle i Gračanice preselilo u Slavoniju, sutješki samostan preuzeo je pastorizaciju preostalih vjernika i poslao im za župnika fra Jaku Tomića, koji je 1699. kupio komad franjevačkog zemljišta od Mustafe Mehmedovića na kojem su franjevci podigli kućicu i predali je na čuvanje jednom katoliku. Franjevci su tako iznova započeli s pastoralnim radom među preostalim katolicima, a Tuzla je tako početkom 18. stoljeća bila jedina župa u cijeloj sjeveroistočnoj Bosni.²⁹ Tuzlanski župnik je morao pastorizirati i Gornju Tuzlu i župu Dragunju. Ove sve tri župe sjedinile su se u jednu. Budući da je i sjedinjenoj župi bilo teško uzdržavati župnika, morao je ovaj, dijelom radi migracija, dijelom radi siromaštva župljana ići od kuće do kuće, gdje bi dobivao ručak i večeru. Kada se broj katolika povećao, i migracije se nešto ublažile, župnici su stanovali u pojedinim mjestima: u Koscima, Grabovici, Lipnici i napokon u Husinu.³⁰

(Priredio, latinske i talijanske dijelove preveo Andrija Zirdum), *Godišnjak od događaja crkvenih, svetovnih i promine vremena u Bosni*, Sarajevo, Zagreb 2003, 19.

²⁹ Filip Lastrić, *Epitome vetustatum provinciae bosniensis (Pregled starina bosanske provincije)*, Venecija 1765, 93; R. Barišić, Nekoliko povijesnih crtica o župi u D. Tuzli, *Vrhbosna*, god. V, br. 16, Sarajevo 1891, 263-264.

³⁰ Župnici župe Donja Tuzla u 19. stoljeću (ukupno ih je bilo 35) bili su: 1. Anto Tomić 1800. godine, 2. Marijan Martinović 1801., 3. Anto Tomić 1803. drugi put (prvi put 1800., a bio je neki Anto Tomić župnik i 1752. godine), 4. Tomo Novaković 1804. drugi put (prvi put je bio župnik 1794.), 5. Luka Ćorić 1806., 6. Anđeo Dugonjić 1807., 7. Martin Crvenković 1811., 8. Blaž Pejić 1815., 9. Ivo Jujić 1816., 10. Bono Filipović 1819., 11. Anđeo Dugonjić 1821. drugi put (prvi put 1807.), 12. Franjo Aždajić 1826., 13. Petar Babajić 1828., 14. Bono Benić (mlađi) 1831., 15. Franjo Migić 1836., 16. Marijan Semunović 1842., 17. Luka Terzić 1853., 18. Anto Ćosić 1854., 19. Marijan Matuzović 1856., 20. Mato Mikić 1858., 21. Josip Divković 1861., 22. Stjepan Jurić 1864., 23. Ivo Oršolić 1865., 24. Franjo Komadanović 1867., 25. Augustin Slišković 1869., 26. Grgo (Lovrić) Čanić 1874., 27. Stjepan (Marković) Čanić 1874., 28. Juro Đipić 1875., 29. Pavao

Godine 1852. prenio je fra Marijan Semunović sjedište šupe iz Husina u Donju Tuzlu i od ove godine stanuju ovdje župnici.³¹ Ovdje je Semunović radio kod osmanskih vlasti oko dozvole da može sagraditi komotniju kuću i crkvu na onom starom zemljištu pod tvrđavom, ali to nije postigao radi blizine tvrđave i što je mjesto bilo među muslimanskim kućama. Poslije toga kupio je sutješki samostan, po nagovoru vicekonzula Maričića, 1856. zemljište na Trnovcu sa kućom i još jednom zgradom od nekog Bećir efendije za 150 zlatnika na kojem je fra Augustin Slišković, uz pomoć osmanske vlade, zatim uz pomoć biskupa Štrosmajera, cara Franje Josipa I i dobrovoljnih prinosa župljana, dobivši od Porte ferman, postavio 1872. temelje crkvi sv. Petra.³²

Nekako u isto vrijeme kada je sutješki samostan kupovao zemlju i vršene pripreme za izradnju temelja nove crkve desio se jedan nesretni slučaj (1858.) u Tuzli u kontekstu kojega se spominje i sudbina starog crkvenog zvona koje je preneseno u Kraljevu Sutjesku. O tom slučaju u svojim *Memoarima* Živko Crnogorčević piše sljedeće:

„(...) Godine 1858. puče grom ovde u džebanu (barutanu). Bila je kula nasred grada, gdi je danas Apelov plac, od devet spratova, i na vrhu kule bio je sat čalan (sat koji izbija četvrti, polovine i cijele sate), koji je izbijao satove 'a la turka', tako da je se čuo, možda, svukud unaokolo jedan sat daljine kada izbija. Grom je upravo puko pred večer (...) u samu kulu gdi je bilo baruta okolo 10000 oka, koje u buradima koje savijenog u fišecina. Otac i ja otišli smo u crkvu jer je bila subota, na večernju, a amidža Milovan i Jovo Maksimović ostali su u magazii. Bila su gradska velika vrata zatvorena. Vrata su tako bila velika da su najveća u visinu i

Semunović 1877., 30. Stjepo Ikić 1882., 31. Franjo Komadanović 1888. drugi put (prvi put 1867.), 32. Ivo Grubišić 1889., 33. Stjepo Ikić 1891. drugi put, 34. Rafo Babić 1895., 35. Stjepo Ikić 1900. godine treći put. Usporedi: *Imenik klera i župa ... za 1910. godinu*; Berislav fra Gavranović, *Uspostava redovite katoličke hijerarhije u Bosni i Hercegovini 1881. godine*, Beograd 1935, 10-11; Julijan Jelinić, *Kultura i bosanski franjevci*, II, Sarajevo, 179; O.J. Matković, *Bibliografija bosanskih franjevaca*, Sarajevo 1896, 28; FSKS, Fra M. Mikić, *Arkiva*, knjiga IV/9, 70; Ambrozije Benković, *Tuzlansko područje negda i sada s posebnim obzirom na vjerske prilike* (Opus posthumum), Županja-Đakovo 1971, 184-196.

³¹ A. Benković, *Tuzlansko područje*, str. 194-196.

³² FSKS, M. Mikić, *Arkiva*, 69; A. Slišković, Crkva u D. Tuzli, na Trnovcu, *Vrhbosna*, god. VI, broj 19, Sarajevo 1892, 313-314.

najšira u širinu kola napunjena sijena proći mogla. Ova ista vrata bila su napravljena od najdeblji rastovije balvana i sva su bila gvoždem pokovana.

Unutra u gradu bilo je u kazamatima još kojekakovi stvari, ali baruta nije bilo. Suviše, bila je u gradu kuća gdi je stanovo Ibrahim dizdar, to će reći čuvar grada, sa familijom, koga ja poznajem. U isti čas kad je grom puko, njegovu se kuća srušila od potresa, i jedna ženska izvana što je došla u posjetu - nju je kuća pritisla i ostala je mrtva, a ostalima nije bilo ništa (...). A gdi je bila kula, nije ostao kamen na kamenu: tolika je ostala jama, rupa, moglo se 100 tovara kreča zavariti (...). Od silnoga baruta uvatio se neko vrijeme mrak nije se ništa vidilo. Kamenje je letilo po vazduhu i padalo četvrt sata daleko od varoši. Jedan kamen udario je u krov kuće Drage Česarevića, probio tavan, i ostao u velikoj sobi u kući, a ono zvono od koje je četvrti udarao kad sahat izbija palo je pol sata daleko u Solini, i neki su seljaci katolici našli i doneli ovđe u Tuzlu paroku. On je pozno da je nekada bilo zvono crkveno te je ukukuruzu u vreći spremio ga u franjevački manastir u Sutjesku. Jednom je seljaku katoliku načaršiji kamen prebio nogu jednu, a više kvara nije bilo nikakva nikome. U našoj magazi, pošto je bila u blizini grada, ona sila od gromovskog pucanja svu je robu iz rafova izbacila dolje na patos, a – puna magaza od izgorenog baruta, patrona i olova.“³³

S obzirom da su zidovi crkve sv. Petra za vrijeme austrijske okupacije dosta popucali i prijetilo joj rušenje, komisija je u jesen 1890. ovu crkvu zatvorila, a mjesto nje, malo niže napravljena je za 300 forinti privremena kapelica u kojoj su vjernici morali u ne vrijeme vani stajati. Da se ova nevolja izbjegne, srušio je ovu crkvu u Trnovcu u novembru 1891. župnik fra Stipo Ikić i započeo graditi novu crkvu (gradnja je trajala od 1893. do 1896.). Ovim radovima preneseno je sjedište župnika opet u grad Tuzlu.³⁴ Crkvu je blagoslovio 4. oktobra 1896. nadbiskup dr. Josip Štadler. Kod ove crkve podigao je 1898. župnik fra Rafo Babić dosta velik župski stan koji je na kapitulu u Plehanu 25. aprila 1967. proglašen samostanom. Ovim proglasom obnovljen je stari franjevački samostan u Tuzli.³⁵ Broj naselja

³³ M. Filipović, *Memoari*, 47-49.

³⁴ Franjevački samostan Sv. Petra i Pavla Tuzla, *Matica kršćenih*, knjiga III za godine 1871.-1883.

³⁵ B. Gavranović, *Rukopis*, 295-302.

župe Donja Tuzla kretao se od 12 do 18 iz razloga što je došlo do osnivanja novih župa sa sjedištem u Breškama (1839.)³⁶ i Morančanima (1858.). Godine 1858. župi Donja Tuzla povraćeni su Vareškići, Dolići i Jasici pod jednim imenom tuzlanska Lipnica, a na istoku Kolovrat, Križani, Grabovica, Gornja Tuzla, Tetima, Kosci i Solina.³⁷

O nekim osobenostima stanovništva župe Donja Tuzla

Kada su u pitanju demografske osobenosti stanovništva Donje Tuzle u 19. stoljeću potrebno je istaknuti sljedeće. Broj stanovnika i broj kuća u župi Donja Tuzla tokom navedenog perioda se mijenjao. Tako je naprimjer 1768. godine u župi bilo 237 kuća i 2.305 stanovnika koji su živjeli u 15 naselja; godine 1813. imala je župa 553 obitelji i 3.779 stanovnika koji su živjeli u 14 naselja;³⁸ godine 1827. imala je župa 246 kuća i 1653 stanovnika u 12 naselja; godine 1855. imala je župa 373 kuće i 2856 stanovnika u 18 naselja. Godine 1864. imala je župa 290 kuća i 1977 stanovnika u 12 naselja. Godine 1885. imala je župa 2610 stanovnika u 17 naselja.³⁹

Podatke o broju kuća i stanovnika u pojedinim naseljima župe Donja Tuzla donosimo u sljedećim tabelama.

Biskup fra Augustin Miletić krizmao je 18. i 20. jula 1813. godine u Lipnici za kućarom (župska kuća) na kneževoj njivici. Kućar je ovdje bio,

³⁶ Do osnivanja župe Breške, župi Donja Tuzla pripadala su sljedeća naselja: Husino i Dobrnja, Dubrave i Živinice, Paoč Selo (Par selo) i Poljana, Lipnica (sjedište), Ljepunice i Pogorioce, Kalajevo i Pasci, Dragunja i Obodnica, Drinjača, Drapnići i Tinja, Jasenica, Dokanj i Grabovica, Breške i Udeč, Orašje i Slavinovići, Tuzla grad. Franjevački vijesnik, br. 4, 1932, 114; Fra Stipo Ikić, *Liber Memorabilium I. Parochiae S. Petri Apostoli in Doljna Tuzla 1892*, 31; B. Gavranović, *Rukopis*, 292-293.

³⁷ Na početku 21. stoljeća župi Tuzla pripadaju sljedeća naselja: Tuzla, Bukinje, Divkovići, Grabovica (Gornja i Donja), Kolovrat, Kosci, Križani, Orašje, Simin-Han, Slavinovići, Solina, Svojtina, Šićki Brod i Tetima.

³⁸ Franjevački samostan Sv. Petra i Pavla Tuzla, *Matica kršćenih*, knjiga I za godinu 1813.

³⁹ *Franjevački vijesnik*, br. 4, 1932, 114; B. Gavranović, *Rukopis*, 305; FSKS, M. Mikić, *Arkiva*, 61; *Franjevački samostan Kraljeve Sutjeske. Šematizam provincije za 1856. godinu; Šematizam provincije za 1864. godinu; Imenik klera i župa za 1885. godinu*; Fra Julijan Jelinić, *Biobibliografija franjevaca Bosne Srebreničke*, Zagreb 1925, 142.

kao i onaj u Husinu, sagrađen na zemljištu tuzlanskog kapetana.⁴⁰ U Drijenči je biskup obavio krizmu u bašči pred kućarom. Župu su ove godine pastorizirala dva franjevca, a imala je 553 porodica i 3.779 stanovnika, i to:⁴¹

Redni broj	Naselje	Broj kuća	Broj stanovnika
1.	Husino i Dobrnja	92	476
2.	Dubrave i Živinice	51	283
3.	Paoč Selo (Par selo) ⁴² i Poljana	29	195
4.	Lipnica (sjedište)	63	441
5.	Ljepunice i Pogorioce	32	260
6.	Kalajevo i Pasci	31	240
7.	Dragunja i Obodnica	65	453
8.	Drinjača	38	326
9.	Drapnići i Tinja	11	65
10.	Jasenica	11	83
11.	Dokanj i Grabovica	59	440
12.	Breške i Udeč	46	386
13.	Orašje i Slavinovići	13	79
14.	Tuzla grad	12	52

Podaci u tabeli pokazuju da je najveći broj stanovnika živio u naselju Husino i Dobrnja (u kojima je prosjek broja članova po domaćinstvu bio 5,17), zatim Dragunji i Obodnici, a najmanje u naseljima Tuzla (prosječan broj članova domaćinstva iznosio je 4,33), te Drapnići i Tinja (imali su prosječno 5,91 stanovnika po jednom domaćinstvu). Prosječno je u jednom

⁴⁰ A. Benković, *Tuzlansko područje*, 192.

⁴¹ Franjevački samostan Sv. Petra i Pavla Tuzla, *Matica kršćenih*, knjiga I za godinu 1813; *Franjevački vijesnik*, broj 4, 1932, 114.

⁴² U maticama tuzlanske parohije od 1793. do 1833. godine navedeno naselje se navodi pod nazivom "Paoč Selo", od 1833. do 1836. "Paorselo", 1836. "Paurselo", a od četrdesetih godina 19. stoljeća "Parselo".

naselju župe Donja Tuzla 1813. godine živjelo 269,93 stanovnika, dok je prosječan broj članova jednog domaćinstva iznosio 6,83 stanovnika.

U narednom periodu broj domaćinstava (kuća) i stanovništva župe Donja Tuzla se mijenjao. Tako je godine 1827. u župi bilo 246 kuća u kojima je živjelo 1.653 stanovnika. Podatke o tome, po naseljima, donosimo u slijedećoj tabeli:⁴³

Redni broj	Naselje	Broj kuća	Broj stanovnika
1.	Husino, sjedište	42	337
2.	Živinice	32	206
3.	Paoč Selo (Par selo)	12	62
4.	Dubrave	16	106
5.	Ljepunice	20	141
6.	Pasci	12	69
7.	Pogorioc	18	97
8.	Morančani	23	130
9.	Kalajevo	29	229
10.	Udeč	16	114
11.	Orašje	10	55
12.	Tuzla	16	87

Podaci izneseni u tabeli pokazuju nekoliko bitnih karakteristika. U Husinu je i dalje bilo najviše naselja (42) u kojima je živjelo najviše stanovnika (337), zatim prema broju stanovnika dolazi Kalajevo, Živinice i druga mjesta. Najmanje stanovnika bilo je u Orašju, Par selu, Pascima i Tuzli. Prosječan broj članova porodice u naseljima sa najvećim brojem stanovnika povećan je na 8,02 po domaćinstvu u Husinu, odnosno 7,9 u Kalajevu. I u naseljima sa najmanjim brojem stanovnika došlo je do povećanja prosječnog broja stanovnika po jednom domaćinstvu (Orašje 5,6; Tuzla 5,43). Prosječan broj članova jednog domaćinstva smanjen je 1827. godine u odnosu na 1813. sa 6.83 na 6,72 stanovnika. Također i po prosječnom broju stanovnika po jednom naselju došlo je do značajnog

⁴³ B. Gavranović, *Rukopis*, 305.

smanjenja u odnosu na raniji period (sa 269,93 na 137,75 stanovnika po jednom naselju).⁴⁴

Prema podacima iz godine 1855. imala je župa Donja Tuzla 2.856 stanovnika koji su živjeli u 373 kuće. Podatke o broju stanovnika i kuća po pojedinim naseljima donosimo u slijedećoj tabeli:⁴⁵

Redni broj	Naselje	Broj kuća	Broj stanovnika
1.	Husino	67	515
2.	Živinice	47	295
3.	Paoč Selo (Par Selo)	16	157
4.	Dubrave	20	129
5.	Ljepunice	17	160
6.	Pasci	15	83
7.	Pogorioc	25	183
8.	Morančani	10	65
9.	Kalajevo	39	358
10.	Udeč	13	89
11.	Orašje –Slavinovići	13	99
12.	Tuzla, matica	31	134
13.	Ljubače	20	190
14.	Mramor	6	54
15.	Podbukinje	5	26
16.	Poljana	14	103
17.	Požar-Medojević	10	74
18.	Rapače	5	42

Prema podacima koje nudi tabela može se vidjeti da je u naselju Husino i dalje najveći broj stanovnika i kuća (prosječan broj stanovnika jednog domaćinstva smanjen je na 7,69), zatim slijede naselja Kalajevo

⁴⁴ Jedan od razloga navedenim promjenama bilo je osnivanje župe Breške 1839. godine. Već sredinom 19. stoljeća (1854. godine) u župi Breške bilo je 367 kuća i 2.439 stanovnika koji su živjeli u 11 naselja (Breške, Dokanj, Grabovica, Lipnica, Čanići, Obodnica, Drienča, Dragunja Gornja, Dragunja Donja, Drapnići, Jasenica). *Franjevački vijesnik*, br. 4, 1932., 114; Fra Stipo Ikić, *Liber Memorabilium I. Parochiae S. Petri Apostoli in Doljna Tuzla 1892.*, 31; B. Gavranović, *Rukopis*, 292-293.

⁴⁵ *Franjevački samostan Kraljeva Sutjeska. Šematizam provincije za 1856. godinu.*

(prosječan broj stanovnika jednog domaćinstva iznosio je 9,18) i Živinice (prosječan broj stanovnika jednog domaćinstva je 6,28). Najmanji broj stanovnika imalo je naselje Podbukinje, Rapače, Mramor i Morančani. Najmanji broj stanovnika po jednom domaćinstvu bio je u Tuzli (4,32), zatim Podbukinju (5,2). Prosječan broj članova jednog domaćinstva u župi Donja Tuzla 1855. godine iznosio je 7,66 stanovnika, dok je prosječan broj stanovnika u jednom naselju iznosio 158,67.

Prema podacima iz 1864. godine župa Donja Tuzla imala je 1.977 stanovnika koji su živjeli u 290 kuća. Podatke o stanovništvu i broju kuća po naseljima donosimo u slijedećoj tabeli:⁴⁶

Redni broj	Naselje	Broj kuća	Broj stanovnika
1.	Lipnica	30	300
2.	Bukinje	7	45
3.	Grabovica	63	386
4.	Kalajevo	43	387
5.	Ljepunice	24	178
6.	Mramor	7	60
7.	Pogorioc	30	197
8.	Rapače	8	48
9.	Slavinovići	10	54
10.	Udeč	16	99
11.	Orašje	15	80
12.	Tuzla grad	37	143

Podaci u tabeli pokazuju da je najveći broj stanovnika župe Donja Tuzla prema podacima iz 1864. godine živio u naseljima Kalajevo, Grabovica, Lipnica i Pogorioci. U navedenim naseljima je bilo i najviše kuća. Najmanje stanovnika živjelo je u naseljima Bukinje, Rapače, Slavinovići i Mramor koji su imali i najmanji broj kuća. Prosječno najbrojnija domaćinstva bila su u Lipnici (10 stanovnika u jednom domaćinstvu), Kalajevu (9), dok su prosječno najmalobrojnija domaćinstva bila u naseljima Tuzla (4,20 stanovnika po jednom domaćinstvu), Orašju (5,33), Slavinovićima (5,4). Prosječan broj stanovnika po jednom

⁴⁶ *Franjevački samostan Kraljeva Sutjeska. Šematizam provincije za 1864. godinu.*

domaćinstvu u župi Donja Tuzla iznosio je 6,82, a prosječan broj stanovnika u jednom naselju bio je 164,74.⁴⁷

Na kraju 19. stoljeća (1885. godine) u župi Donja Tuzla živjelo je 2.610 stanovnika raspoređenih u 17 naselja. Prosječno je u jednom naselju živjelo 153, 53 stanovnika što predstavlja smanjenje u odnosu na raniji period. Najviše stanovnika živjelo je u naselju Kalajevo (470), Lipnici (346), Tuzli (298), a najmanje u Vilušićima (24), Brgulama (50), Solini (51), Tetimi (58).⁴⁸

Druga bitna osobnost stanovništva župe Donja Tuzla u 19. stoljeću ogleda se u činjenici da se broj članova porodice, također, mijenjao u smislu da se broj članova porodice konstantno smanjivao. Na osnovu naprijed iznesenih podataka u tabelama može se vidjeti da je na početku 19. stoljeća jedna porodica brojala prosječno oko 10 članova, a da se taj broj u narednom periodu značajno smanjio tako da je prema podacima iz 1864. godine iznosio manje od 7 članova po domaćinstvu.⁴⁹

Zanimljivo je napomenuti da je tokom 19. stoljeća bilo porodica koje su imale 30 i više članova. Tako je naprimjer u Breškama domaćin Mato Stojaković imao 32 člana porodice, u Drinći Marijan Kovač 32, Stipo Jurić iz Dragunje 30, u Jasenici Nikola Pranić 27, Marko Dominković iz Dobrnje 27, Ivo Božić iz Husina 27, u Dragunji Lovro Jurić 27, Anto Tašević iz Doknja 24, Ivo Tomić iz Grabovice 24, Ivo Stipanović iz Dagunje 23, Ivo Marković imao je 22 člana porodice. Prema raspoloživim podacima može se saznati da su porodice živjele u skromnim uslovima, ali u harmoniji i međusobnom uvažavanju. Kada god je bilo prilike našlo se vremena da se zapjeva, rasonodi i razveseli.⁵⁰

⁴⁷ Brojčano smanjenje broja stanovnika u period od 1855. do 1864. godine uvjetovano je osnivanjem samostalne župe Morančani.

⁴⁸ Podaci o broju stanovnika župe Donja Tuzla za 1885. godinu po naseljima: Kalajevo 470 stanovnika, Lipnica 346, Tuzla 298, Pogorioci 230, Ljepunice 190, Grabovica 182, Mramor 123, Orašje 121, križani 120, Udeč 119, Rapače 99, Kosci 74, Slavinovići 66, Tetima 58, Solina 51, Brgule 50, Vilušići 24 stanovnika. (*Franjevački samostan Kraljeva Sutjeska. Imenik klera i župa za 1885. godinu*; Fra Julijan Jelinić, *Biobibliografija franjevaca Bosne Srebreničke*, Zagreb 1925, 142).

⁴⁹ Do 2009. godine broj stanovnika župe Tuzla iznosio je 4.968 župljana koji su živjeli u 2.003 porodice. To znači da je prosječan broj članova jedne porodice bio 2,5 stanovnika.

⁵⁰ Dominik Mandić, *Chroati Bosnae et Hercegovinae*, Chicago-Roma 1962, 64-67.

Jedna od karakteristika ogleđa se u činjenici da je stanovništvo župe Donja Tuzla dijelom starosjedilačko, ali je jedan broj doselio iz različitih krajeva. Prema podacima koje donose neki istraživači smatra se da su katolici velikim dijelom doseljenici iz Srednje Bosne, ali da ih ima i iz drugih krajeva, a da je ostao i jedan mali dio starosjedilaca. Stariji stanovnici iz Brešaka i jednog dijela Doknja pripovijedaju (Jeremić je podatke prikupio od Fra Anđela Brkovića župnika iz Brešaka, op.a.) da su im preci izbjegli iz Tuzle zbog progona od Osmanlija.⁵¹ Priča se da su i Tuzlani u općini Donja Mahala i Tuzlani u općini Gornja Tramošnica izbjegli iz Tuzle iz istog uzroka. Jeremić kaže da za tuzlansko selo Marinovići postoji predanje da su starinci i da je njihov predak Marin kazao Osmanlijama tajne opoložaju vojske „kralja mađžarskoga“ pa da su mu oni za tu uslugu dali zemlju i oslobodili ga zauvijek od svih nameta. Marinovići su do skoro bili jedino selo u onom kraju koje nije bilo ukmećeno već su bili „vazda svoji na svome“. I Divkovići su jaka starinska porodica - od Jelašaka - i ima je i danas u devet sela kotara tuzlanskoga. I Banovići su stara porodica koja je u prošlom i pretprošlom stoljeću (17. i 18. stoljeće) živjela u četrnaest sela tuzlanskog kotara, a 1923. godine je bila samo u četiri. Porodica Čanići osnovala je selo koje se nazvalo po njenom imenu. Jeremić kaže da u tuzlanskoj oblasti ima doseljenika iz Vrljike, od Kreševa, sa Kupresa, Duvna, Neretve, iz Tuholja, od Travnika, Bugojna, Livna, Žepča, Vareša, Pdnice, Rame, Donje Hercegovine i Dalmacije.⁵²

Među faktorima koji su imali utjecaja na osobenosti stanovništva župe Donja Tuzla tokom 19. stoljeća potrebno je spomenuti, prije svega, prirodni priraštaj stanovništva. Naime, za period 19. stoljeća karakterističan je razvoj visokog nataliteta, ali uporedo i mortaliteta, tako da je veliki mortalitet, naročito djece, nadoknađivan još većim natalitetom. Trend porasta stanovništva Bosne od 1841. do 1879. iznosio je 1,26. Od 1819. do

⁵¹ Kakav je bio odnos onovremene tzv. kršćanske Evrope prema bosanskohercegovačkim katolicima možda je najslikovitije i najsažetije zabilježio i sačuvao franjevac Ivan Frano Jukić. Naime, on navodi da je jedan franciškani molio nekog ministra da se Austrija zauzme kod osmanskog devleta da bi se „katolike izbavilo od progona i život učinilo podnošljivijim“. Ministar je tada upitao fratra: „Progone li Turke u Bosni“? Fratar odgovara „ne“. Ministar će na to franciškani: „A vi se isturčite, pa će vam bolje biti“. (Ivan Frano Jukić, *Zemljopis i poviesnica Bosne*, Zagreb 1851, 141).

⁵² Risto Jeremić, O poreklu stanovništva Tuzlanske Oblasti, *Glasnik geografskog društva*, br. VII-VIII, Beograd 1922, 141-157.

1879. godine stanovništvo je poraslo za preko četiri puta. Ovako veliki porast daleko je iznad evropskog prirasta, koji je u razdoblju od 1700. do 1800. godine prosječno godišnje iznosio svega 0,6 posto.⁵³ Od ostalih faktora nisu zanemarive ni razne zarazne bolesti (kuga) i epidemije. Naročito su bile katastrofalne epidemije tokom 18. stoljeća, a posebno 1813-1818. godine. Tokom ove posljednje kuge broj katoličkog stanovništva u Bosni smanjen je sa 104.361 koliko je bilo uoči kuge na 50.391 osobe u 1818. godini. Kada je riječ o epidemijama, posebno kugi, na prostoru Tuzle zabilježeno ih je u drugoj polovini 19. stoljeća nekoliko. Jedna od njih bila je 1855. godine. U Tuzli je nekoliko dana umiralo od 5 do 7 stanovnika.⁵⁴ U nešto manjoj mjeri svoj utjecaj na osobnosti stanovništva navedenih župa imali su i drugi faktori: vjerske konverzije,⁵⁵

⁵³ Muhamed Hadžijahić, Neki rezultati ispitivanja etničkih kretanja u Bosni u XVIII i prvoj polovici XIX stoljeća, *Prilozi*, god. XI-XII, br. 11-12, Sarajevo 1975-1976, 289-300.

⁵⁴ Gustav Bodenstein, Povijest naselja u Posavini godine 1718.-1739, *GZM*, XIX, Sarajevo 1907, 155-190, 359-390, 575-618; M. V. Batinić, Nekoliko priloga k bosanskoj crkvenoj povijesti, *Starine JA*, knj. XVII, Beograd 1885, 77-150; Luka Đaković, Katoličko stanovništvo BiH u XVIII vijeku – u svijetlu nepoznatih podataka, *Jugoslavenski istorijski časopis*, br. 1-2, Beograd 1978, 158-166; Galib Šljivo, *Bosna i Hercegovina 1854.-1860.*, Landshut 1998, 542; Galib Šljivo, Prilike u zborničkom kajmakamluku i proglašenje Hatihumajuna 1856. godine, *Istorijski zbornik*, IV, 4, Banjaluka 1983, 163-178.

⁵⁵ Istraživanje i praćenje obima konverzije (vjerska preobraćanja) za period 1879.-1900. godine ne predstavlja praktično nikakav problem, zbog toga što su austrougarske vlasti sprovodile precizno prebrojavanje, te njihove cifre daju realnu garanciju za tačnost. S druge strane, od sredine 19. stoljeća do 1878. godine, tj. tokom perioda primjene osmanskih reformi poznatih pod nazivom *Tanzimat*, nailazimo na mnogo veće komplikacije u vezi sa tačnošću cifara, pošto jedine podatke dobijamo ili od konzularnih ili od franjevačkih izvora, a slični podaci ne mogu se naći u kadijskim protokolima, naročito kada govorimo o onim kadijskim protokolima koji su sačuvani i objavljeni u prijevodu, ali i u osmanskim narativnim izvorima. Vidi: Hatidža Čar-Drnda, *Sidžil Tešanjskog kadiluka (1740.-1752.)*, Sarajevo 2005.; T. Katić, *Maglajski sidžil (1816.-1840.)*, Sarajevo 2005.; Zejnil Fajić, Husein Bračković, Mala historija događaja u Hercegovini. Uvod i prevod s turskog, *Prilozi za orijentalnu filologiju*, br. 34, Sarajevo 1984, 163-200; Ahmed S. Aličić, Manuskript *Ahvali Bosna* od Muhameda Emina Isevića (poč. XIX. v.), *POF*, br. 32-33, Sarajevo 1982, 163-198; Salih Sidki Hadžihuseinović Muvekkit, *Povijest Bosne*, Tom 2, Sarajevo 1999; Philippe Gelez, Vjerska preobraćanja u BiH (1800-1918.), *Historijska traganja*, br. 2, Sarajevo 2008, 17-75; Fahd Kasumović, Prijelazi na islam u sidžilima Sarajevskog šerijatskog suda iz prve polovine 19. stoljeća, *Identitet Bosne i Hercegovine kroz historiju. Zbornik radova*, 1, Sarajevo 2011, 215-238.

ljudski gubici u ratovima, migraciona kretanja,⁵⁶ te osnivanje nekoliko novih župa (Breške 1839., Morančani 1858., Lukavac 1910.).⁵⁷

Zaključak

Za stanovnike župe Breške i Donja Tuzla, katolike, općenito, od posebnog značaja bila je djelatnost franjevacu tokom dužeg vremenskog perioda. Zahvaljujući njima, bez obzira na brojne poteškoće kroz koje su prolazili, katolici navedenih župa su, nekad u većem a nekad u manjem broju, opstali kroz cijelo vrijeme osmanske uprave u Bosni. Po svome teritorijalnom opsegu navedene župe su bile podložne čestim promjenama. Tako je, naprimjer, župa Donja Tuzla početkom 19. stoljeća obuhvatala 18 naselja, da bi tokom stoljeća, uslijed formiranja novih župa, broj naselja bio konstantno smanjivan.

I broj stanovnika navedenih župa se mijenjao, o čemu donosimo relevantne podatke. Analizirajući podatke o broju stanovnika tokom stoljeća uočljivo je da se broj stanovnika u jednom domaćinstvu smanjivao ukoliko posmatramo prosjek, ali isto tako i u naseljima. S vremenom naselje Donja Tuzla je bivalo sve privlačnija sredina za život župljana u odnosu na okolna naselja s obzirom na činjenicu da je u Tuzli početkom stoljeća živjelo svega 52 stanovnika, da bi se taj broj povećao na 143 osobe do druge polovine 19. stoljeća. Za navedeno stoljeće karakteristične su porodice koje su imale znatno veći broj članova (neke i po 32 člana) u odnosu na porodice s početka 21. stoljeća koje imaju u prosjeku 2,5 članova. I pored brojnosti, unutar porodica vladali su patrijarhalni odnosi, uzajamno poštovanje i međusobno razumijevanje.

⁵⁶ Ilustracije radi 1675. godine (prije početka Bečkog rata) u tuzlanskom kraju, od Krivaje do Save, bilo je četiri franjevačka samostana, 12 katoličkih župa i preko 32.000 katolika. U istom kraju 1708. godine zatečen je samo jedan samostan i to onaj u Tuzli koji je bio nenastanjen i obrastao trnjem, jedna župa sa oko stotinu katoličkih porodica. (L. Đaković, *Katoličko stanovništvo*, 158-166).

⁵⁷ Ambrozije Benković, *Naselja Bosne i Hercegovine sa katoličkim stanovništvom. Katoličke župe Bosne i Hercegovine i njihove filijale od XII vijeka do danas*, Đakovo 1966.

**ROMAN CATHOLIC PARISHES BREŠKE
AND DONJA TUZLA IN THE 19TH CENTURY.
ESTABLISHMENT, TERRITORIAL FRAMEWORK
AND CHARACTERISTICS OF THE POPULATION**

Summary

For the population of Catholics parishes Breške and Donja Tuzla the activity of Franciscans was of particular importance and significance. Thanks to them, despite of many difficulties, Catholics of Breške and Donja Tuzla survived for a long time of the Ottoman rule in Bosnia. Parishes' territory Breške and Donja Tuzla were subjected to frequent changes. Donja Tuzla, for example, at the beginning of 19th century had eighteen settlements. The population had been constantly changing and on that we brought relevant data. During the time Donja Tuzla attracted many inhabitants from the villages. At the beginning of 19th century in Donja Tuzla lived 52 inhabitants. The number tended to increase. To the second half of 19th century the population grew to 143 person. In this century the characteristic of the population was that some family had about 32 members. Despite of the large number of family members there were harmony, respect and understanding among the population.

UDK 94

ISSN 2303-8543

**DRUŠTVO HISTORIČARA TUZLANSKOG KANTONA
ODSJEK ZA HISTORIJU FILOZOFSKOG FAKULTETA
UNIVERZITETA U TUZLI**

HISTORIJSKA MISAO HISTORICAL THOUGHT

1

HISTORIJSKA MISAO (online izdanje), GOD. I, BR. 1, 1-312, TUZLA, 2015.